


國朝柔遠記

國朝志



國朝柔遠記卷十五

臣 彭玉麟恭定

臣 王之春敬編

庚申 咸豐十年

冬十月建總理各國通商事務衙門

時各國交涉紛煩軍機處難以兼理因議建總理衙門
奉 上諭恭親王等奏辦理通商善後章程一摺均
係實在情形卽照原議辦理京師設立總理各國通商
事務衙門著卽派恭親王奕訢大學士桂良戶部左侍
郎文祥管理並著禮部頒給欽命總理各國通商事務
關防應設司員卽於內閣部院軍機處各司員內滿漢

挑取八員卽作爲定額毋庸再兼軍機處行走輪班辦事侍郎銜候補京堂崇厚著作爲辦理三口通商大臣駐紮天津管理牛莊天津登州三口通商事務會同各該將軍督撫府尹辦理並頒給辦理三口通商大臣關防其廣州福州廈門甯波上海及內江三口潮州瓊州臺灣淡水各口通商事務著江蘇巡撫薛煥辦理新立口岸惟牛莊一口歸山海關監督經管其餘登州各口著該督撫會同崇厚薛煥派員管理所有各國照會隨時奏報並將原照一併呈覽一面咨禮部轉咨總理衙門並著各該將軍督撫互相知照其吉林黑龍江中外邊界事件並著該將軍等據實奏報不准稍有隱飾一

俄人請助剿代運不許

俄人換約之後亦有助兵剿賊代運南漕之請王大臣
等以聞奉 行在諭本年秋間英法兩國帶兵撲犯都
城業經換約退兵俄羅斯使臣伊格那替業幅亦卽隨
後換約該酋見恭親王等面稱髮逆在江南等處橫行
請令中國官兵於陸路統重兵進剿該國撥兵三四百
名在水路會擊必可得手又稱明年南漕運京恐沿途
或有阻礙伊在上海時有美國商人及中國粵商情願
領價採辦台米洋米運京如今伊寄信上海領事官將
來洋船沙船均可裝載用俄美旗幟卽保無虞等因中
國剿賊運漕斷無借資外國之理惟恐江浙地方糜爛

兵力不敷剿辦如借俄兵之力幫同辦理逆賊若能早平我之元氣亦可漸復但恐該國所貪在利藉口協同剿賊或格外再有要求不可不思患預防法郎西在京時亦有此請著曾國藩等公同悉心體察如利多害少尚可爲救急之方卽日迅速奏明候 旨定奪至代運南漕一節江浙地方淪陷明年能否辦理新漕尙無定議然漕糧爲天庾正供自不可缺該商所稱采辦運津是否可行應如何妥議章程辦理之處並著曾國藩袁甲三薛煥王有齡酌量情形迅速具奏嗣經袁甲三奏覆略云我軍剿賊向來水陸兼籌並非專恃陸路長江上下均有水師本與旱隊互相策應如艇船紅單長龍

舳板拖罾等船不下數百號所招廣楚各勇器械精良
遞著戰功果能統率得人妥爲駕馭不難得其死力非
中國無水兵也亦非中國水兵不如外國也今該夷請
我軍由陸路進剿該國撥兵三四百名在水路會擊以
每船數十人計之夷船不過數號而謂必可得手臣愚
未敢遽信也且我軍廣楚各勇係內地民人尙有因糧
餉不足延不起碇並結黨肆搶情事矧外夷之人祇能
將就牢籠而不能服我節制者乎此時協同剿賊卽謂
自備口糧而我之隨時犒賞必不可少幸而戰勝則矜
功要挾所求無厭豈能滿其所欲不幸偶有小挫或船
隻損壞或兵丁傷亡勒索賠償又將有詞可藉誠如

聖諭該國所貪在利格外要求不可不思患預防也
不但此也我軍水師廣勇居多該夷之與我爲難亦多
挾廣勇而來萬一私相勾結其禍更烈卽令杜其勾結
而以桀驁不馴之徒兩相猜忌則爭端競起必至枝節
橫生況夷人素習天主教本年六月卽有墨利加國借
英夷船駛赴金陵傳教之事髮逆之煽惑人心亦藉天
主教爲名與該夷所習相同難保無暗中勾通情弊一
旦奉命而來久居內地引虎入室並且爲虎添翼恐
此時招之使來他日不能麾之卽去也體察情形熟思
審處非特利少而害多實覺有害而無利區區愚衷竊
以爲必不可行惟求皇上乾綱獨斷計出萬全與

其悔之於後不如愼之於初也抑臣更有請者夷人名爲就撫實則包藏禍心若眞有利於我該夷亦必不肯爲我謀上年俄夷進火器一萬件彼時外間聞之均以兩國相爭斷未有肯以火器予人者該夷必別有詭謀繼果藉詞遷延逞其愚弄之計本年各夷犯順安知非俄夷唆使邪且俄夷向於內城設館人地最爲熟悉本年聞在天津議事者卽前往俄館之人人都人尙能識之該夷距我甚近水陸兼通尤不可不加意嚴防也至交商買米借用俄美旗幟保護運津一節以現在夷情揣之其氣甚驕其心愈侈萬一發價之後事有變遷恐更無計可施都中需米甚殷臣於海運事宜未能深悉應

如何設法轉輸曾國藩等自能遵 旨妥辦另候

聖裁國藩煥有齡等覆奏尋至旋奉 上諭恭親王

奕訢等議曾國藩袁甲三薛煥瑞昌王有齡等各摺片
稱江南官軍尙未能進剿金陵卽令夷船駛往非但不
能收夾擊之效並恐與賊相持如薛煥所慮句結生變
尤宜預防該撫所擬令夷兵由陸路進剿非獨經過地
方驚擾卽支應一節諸多窒礙夷性貪婪一經允許必
至索請多端經費任其開銷地方任其蹂躪等語並於
英酋威妥瑪來見與之談論終日該酋已吐實語謂剿
賊本中國應辦之事若借助他人不占地方於彼何益
非但俄法克復城池不肯讓出卽英國得之亦不敢謂

必不據爲己有因舉該夷攻奪印度之事爲證借夷剿賊流弊滋多不可因目前之利而貽無窮之患惟此時初與換約拒絕過甚又恐夷性猜疑轉生叵測惟告以中國之兵力足敷剿辦將來如有相資之處再當借助以示羈縻並設法牢籠誘以小利法夷貪利最甚或籌款銷其槍礮船隻使其有利可圖即可冀其睚就以爲我用儻上海夷人諄請助兵剿賊著曾國藩薛煥量爲獎勵續有兵船駛入內地案照條例攔阻並著該大臣等就現在兵力設法攻剿逆賊毋再觀望至法夷槍礮旣肯售賣並肯派匠役教習演造亦令曾國藩等酌量辦理卽外洋師船現雖不暇添製或仿夷船製造或將

彼船撥用誘之以利以結其心而我得收實濟其受雇

助剿祇可令華夷自行辦理

二語係硃筆點改

於大局或有裨

益仍卽在於通商稅內籌辦至代運一節由薛煥招商
運津無論華夷一體販運無須與該夷預行會商美性
較純與英法不同其應如何駕馭俾其感順以杜俄夷
市德於彼之心亦著曾國藩等妥爲辦理於是助剿代
運之議遂寢

辛酉 咸豐十一年

春正月考取滿漢軍機章京入總理衙門辦事

江西布政使張集馨赴九江辦理開市事宜

初英酋卜魯士照會同時換約之王大臣稱現行天津

新議第十款所載長江一帶各口英商船隻俱可通商
本國現擬於漢口九江兩處先行開商惟現江西尙未
安靖所有兩口通商之處照後開章程暫行辦理凡有
英船上下大江裝載貨物無論進口出口應納稅餉均
在上海或鎮江各關按照新章納稅各關監督皆宜妥
爲設法務使各船遵行再英船欲上大江當向海關先
行報明所存保護船隻之兵器火藥鉛彈若干請給照
單該關口查明所報軍器數目如在情理之中卽應注
明給發儻查有額外軍器或並無照單私行售賣軍器
藥彈等物卽將該船所載貨物全行入官並驅逐該船
出口不准在江面貿易以上各節應請查照並咨湖北

江西各大吏一體遵辦總理通商衙門據奏允准覆以
南省軍務尙未肅清長江道路是否疏通應由貴大臣
斟酌辦理時江西巡撫毓科奏九江通商事屬創始關
係甚巨恐非九江關監督一人所能辦理擬請遴委藩
司大員赴潯會同籌辦現藩司張集馨詳稱徽地巨寇
分股竄陷東流建德上犯湖口彭澤勢甚猖獗潯郡一
帶商賈屏跡此時遽往商辦不但交易無人尤恐逆氛
肆擾有礙外國舟行應請展緩赴潯因亟飛章 行在
而英水師兵頭霍某遽以小火輪兵船五載兵八百偕
洋商於初二日自吳淞口起碇駛赴長江初十日抵鎮
江於雲台山在鎮江城西門外規造公署商棧其水師提督和

普赴江甯上游參贊巴夏里亦相繼赴九江漢口皆沿江探水登岸測驗形勢商民不知所爲所至震駭文報
咨至南昌毓科亟飭集馨帶員遄赴九江辦理建立通
商馬頭之事

二月英人始立漢口市埠

前月二十六日英國火輪船一抵漢口其酋威司利行
商韋伯通事楊光讓等渡江至武昌見大學士總督官
文漢遂覓棧房一所議歲給房租銀四百兩畱楊光讓
住漢是月朔巴夏里續以小火輪兵船四載兵數百至
漢偕屬官往見官文亦稱查辦九江漢口開港事以九
江諸事未定先來漢勘地建棧通商其水師提督賀布

亦次日率屬官二十人來言將往上游探水非有他意
官文遂飭於所經地方文武沿途迎護巴夏里因於楊
林口在漢口鎮下街尾定基橫闊二百五十丈縱長百一十丈
府縣會勘立界藩署給丈量地基租約鈐印交在漢領
事同地方官集居民議價立券照給畢聽英商興築棧
房應納丁漕歲由英商赴縣清完其他國來漢立埠須
在英行以下擇地蓋棧不得上占正街議甫定賀布自
上游返旋與巴夏里先後東行畱夏某以小火輪船一
碇泊漢口是爲英人立漢口市埠之始

英人始立九江市埠

江西布政司張集馨赴九江途接廣饒九南道文恆署

九江知府程元瑞亟報遄抵九江未幾巴夏里自漢口至與會商租地立市事而巴夏里欲先察上下游地勢始定議十三日遂偕往湖口諸酋僉以湖口地扼鄱陽總滙爲江西門戶欲在彼立市委員馬長康告以湖口城內多亂石城外俱沙土難建樓棧且峭岸急湍風濤險惡商船難泊必多裹足又地接建德東流時虞賊擾水陸防軍雜處易啟衅端不如九江且符原議巴夏里始與諸酋以遠鏡四覷以盤盛水銀測驗地底果皆沙石遂允回九江十五日於龍開河在九江府城西門外東量地橫闊一百五十丈縱長五十丈巴夏里謂弓步未準再按指南鍼以繩較準得縱長六十丈內民居三百餘戶巴